

PILOTA

Urrezko bi xistera jokoan

Rekaldek eta Aranburuk, Konpa eta Felixen aurka jokatu dute gaur Gernikan

Rekalde-Aranburu eta Konpa-Felix bikoteak izango dira aurrez aurre gaur Gernikako Jai-Alai frontoian jokatu den Urrezko Xistera txapelketako finalean. Bi bikote hauek ez dute partidu bat bera ere galdu lehiaketa hasi zenetik eta ez dago faboritorik azpimarratzerik. Jaialdiari amaiera emateko, Remen eta Arrasate ariko dira buruz buruko lehiari.

RAMON BASALDUA / BILBO

Rekalde eta Konpa, etorkizun handiena duten zestariak ariko dira Eusko Pilotak antolatu duen Urrezko Xistera txapelketako finalean. Ramon Aranburu izango da markinarraren atzelaria eta Felix Espillak jokatu du Konparekin. Bi bikoteak goi mailakoak dira eta oso zaila litzateke faboritoren bat azpimarratzea.

Rekalde eta Aranburu garaile izan dira Remen-Retolaza, Uriarte-Arkarazo eta Jauregi-Goitia bikoteen aurka jokatu dituzten partiduetan. Era berean, Konpak eta Felixek hiru garai-pen eskuratu dituzte, Castaños-Unanue, Jauregi-Goitia eta Uriarte-Arkarazoren aurka jokatu dituzten norgehiagoketan. Zertan esanik ez dago bi bikoteek goi mailako jokoa erakutsi dutela Urrezko Xistera txapelketan. Final hau oso momentu egokian heldu zaie lau pilotariei.

FABORITORIK GABEKO PARTIDUA Gaurko partiduak ikusmina sortu du eta Gernikako Jai Alai frontoia bete egingo da aurreko koadroetan Konpak eta Rekaldek izango duten lehia ikusteko. Markinarrak sekulako denboraldia egin zuen 1994an, Mexikon bi txapelketa irabazi ondoren, bigarren izan baitzen Goitiarekin jokatu zuen Munduko Txapelketan. Orduan bere aurkaria izan zen Ramon Aranburu izango du kide gaurko partiduan. Konpak ez du bere maila erakutsi orain arte jokatu dituen profesional mailako txapelketetan. Bere joko ona tituluren batekin osatzea falta zaio gasteiztarrari. Urrezko Xisteran inoiz baino lasaiago jokatzen ari da eta ez du aurreneko goi mailako txapelketa eskuratzeko aukera alferrik galdu nahi.

Aurreko koadroetako lehia ikusgarria izango bada ere, atzeko koadroetan ere borroka ederra izan daiteke Felix eta Aranbururen artean. Erregularitasuna da Aranburu Gernikako atzelariaren ezaugarri nagusia eta iaz denboraldi ederra egin on-

KONPA	REKALDE
31-1-72 (22 urte)	15-6-72 (22 urte)
1,74 m	1,73 m
74 kilo	79 kilo
Debuta: Gasteiz 8-8-92	Debuta: Mexiko 1990

Afizionatutan	1993
☐ Munduko Txapelketa Kuban (1990)	☐ Sub'22 Munduko Txapelketa Arriagarekin
☐ Sub'22 Munduko Txapelketa Mexikon (1991)	
☐ Urrezko Domina Bartzelonako Olinpiadetan (1992)	

Profesionalen	1994
☐ Miarrizteko bi masters, Atainekin eta Felixekin	☐ Diez Barroso Txapelketa Elorzarekin
☐ Bilbo Hiria torneo	☐ Ciudad de Mexico Txapelketa Mandiolarekin
☐ Plentzia Hiria torneo	☐ Gonbidapeneko Mundiala Osarekin
	☐ Munduko txapeldunordea Goitiarekin



Txapelketa ona jokatu du Aranburuk.

MARCOS ESTEBANEZ

doren aurtengoari ere hasiera ona eman nahi dio munduko txapeldunak. Felix Espillak erabaki lezake gaurko finala. Berriatuko atzelariaren eskuina ikaragarria da eta azken partiduetan erakutsi duen jokoa eginez gero aurkari zaila izango da Aranbururentzat.

Katxin Uriartek eta Jabi Arkarazok, Jauregi-Goitia, iazko txapeldunen aurka jokatu dute hirugarren eta laugarren posturako partiduan. Bi bikoteek partidu bina galdu dituzte eta irregularitasuna izan da euren aurkari nagusia. Nolanahi ere, laurak goi mailako pilotariak dira eta ikusizun ederra eskaini lezakete. Karlos Arrasate eta Juan Ramon Rementeria 'Remen' ariko dira nor baino nor buruz buruko partiduan. Lekeitiarra nagusitu zen Euskadiko txapelketako finalean, aurreko bi urteetan txapeldun izan zen bermeotarraren aurrean. Remen, gainera, ez dabil joko askorekin, baina buruz buru jokatzeko duen trebezia kontuan izanik, beti da arriskutsua horrelako partiduetan.

Pilotari berriak Eusko Pilotan

R. B. / BILBO

Aitor Totorika eta Rafa Piedrak zuzentzen duten Eusko Pilotak enpresak bere koadro berria aurkeztuko du gaur Gernikako Jai Alai frontoian. Iaz 40 pilotari izan baziren, aurtun 27 ariko dira. Aurrelariak dagokienez, Arrasate, Remen, Uriarte, Konpa, Jauregi, Castaños, Etxalus, Lander, Mayo, Madariaga, Egiguren II, Bereikua eta Gorroño izango dira lehiari. Atzeko ko-

droetan, Aranburu, Felix, Goitia, Arkarazo, Unanue, Castro, Elizegi, Loibe II, Egiguren I, Bilbo, Mikel, Aranza II, Fundazuri eta Aldazabal ariko dira. Lau pilotarik egingo dute debuta profesionalen, Iker Gorroñok, Julen Bereikuak, Iñaki Aldazabalek eta Mikel Fundazurik hain zuzen.

Gonzalo Beaskoetxea, Azkarate, Irusta, Aperribai, Barandika, Llona, Uria, Berraondo, Onaindia, Artetxe, Zigor, Reto-

laza, Barrondo, Olano, Olabe, Okamika eta Dominguez koadrotik at geratu dira. Gerrikan, Ajangizko atzelaria, lesionaturik dago eta ikusi egin beharko da berriro jokatzeko prest izango den.

Beste alde batetik, Eusko Pilotako arduradunek fitxaketa batzuk egiteko asmoa agertu dute. Beraz, Atain, Rekalde, Lauzirika eta Arriaga ikus ditzakegu aurtun Gernikako Jai Alai frontoian.

SASKIBALOIA

Nafarroako CBN taldeak agur esan dio Ronchetti Kopari

IRUÑEA

CBNk 83-79 galdu zuen asteazkenean Parman bertako taldearen aurka, Ronchetti Kopan barna eta final-zortzirenetako ligatxoko bosgarren jardunaldian. Partidua ezezik, final-laurdenetara pasatzeko aukera guztiak ere galdu zituzten nafarrek; izan ere, halabeharrez garaipena lortu behar zuten sailkatzeko itxaropenei heldu ahal izateko. Parte hartzeko diru arazoak izan arren, emaitza bikainak lortu ditu CBNk lehiaketa honetan. Ligatxoko bigarren talderik hoberena izan zen, Parmaren atzetik, harik eta PSVK taldearen kontra, eta uste ez bazen ere, etxean galdu zuten arte.

Partidu hori galdu eta gero, gutxi ziren nafarrek final-laurdenetara heltzeko zeuzkaten aukerak, eta asteazkenean aukera urri horiek ere galdu zituzten.

XAKEA

Morozevitx, txapela eskuratzear

IRUÑEA

Morozevitx errusiarrak berriro ere garaipena lortu zuen joan den asteazkenean jokatuak Iruñeko Xake Txapelketako azkenaurreneko jardunaldian, Magement aurka. Errusiar gazteak jarraian lortu zuen laugarren garaipena zen hura. Horri esker, atzo jokatuak azken jardunaldiaren atarian bera zen, sei punturekin, sailkapeneko lehena, Zvjaginsev 5,5 punturekin bigarrena, eta Topalov bost punturekin hirugarrena.

Jardunaldi horretan garaipena lortu zuten Kortxnoi Rivasen kontra, Zvjaginsev Frankoren kontra eta Topalov De la Villaren aurka. Comasek eta Yudasinek parra egin zuten. Hauek izan ziren atzo jokatuak azken jardunaldiko norgehiagokak: Yudasin-De la Villa, Morozevitx-Comas, Rivas-Magem, Zvjaginsev-Kortxnoi eta Topalov-Franco.